



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir\_yimym



tir yimym

TAPAK 7

**Parliament nung rongrong adok;  
Hombar tashi senden thinenogo**

**Donald Trump  
lendong nung lir: Vladimir Putin**



VOL. XXII ISSUE NO. 51 (ADOK 51)

DIMAPUR

KÜPTOKNÜ (SATURDAY)

YIMPOKSÜI (NOVEMBER) 30, 2024

₹ 5.00

## Dimapur Police-i 'speed limits' latettsür

Dimapur, November 29, 2024 (TYO): Dimapur Police-i district nung gari lendongtem atalokba azüoktsü atema lenmang balala nung 'speed limits' latettsüogo.

Iba inyakym ya December 1, 2024 nungi tenzüksü aser January 1, 2025 tashi benshitsu ta Dimapur Police-i ashi.

"Item speed limits sülen manidakertem Motor Vehicles Act nung Section 183 kübok temerenshi alitsü" ta Commissioner of Police, Dimapur Kevithuto Sophie, IPS-i sangdong ka nung metetdaksü.

### Speed limits:

Zion Hospital Junction nungi Chümoukedima - 50 kmph (kilometre per hour)

Chathe Bridge (Patkai-

Seithekema) nungi Assam/ Niuland district - 50 kmph

Dimapur city area - 30 kmph

Dimapur Police-isa drivers & passengers-i seatbelts enoktsü aser two-wheel riders-i protective headgear asemtsü metetdaksüogo.

Gari anidang mobile phones amala handheld device mamshitsu, yi jemer gari manitsu, designated areas nung garitem anentsü, Purana Bazar nungi Chumoükedima tashi parallel parking, retrofits (tinted glasses, bull bars, beacon lights, pressure horns, mesürs unapproved modifications) mamshitsu aser temporary permits maliba unregistered vehicles aputsü ta Dimapur Police-isa metetdaksüogo.

## KU-i NSCN-K (Ang Mai) dang nisung chioktsü tuyur

Dimapur, November 29, 2024 (TYO): November 25, 2024 nü NSCN-K (Ang Mai) züngsemtemi Hati Camp (Namtola) nung alir Md. Muslek Ali pur aoba aitsür ta Konyak Union (KU)-i metetdaksüba den ghonda 24 tsüngda pa chioktsü mapang züngzüksüogo.

Ghonda 24 tsüngda Ali mechiokra KU-i NSCN-K (Ang Mai) telok den public non-cooperation sangdongtsü ta parnoki metetdaksü.

Konyak aser Assamese nunger tsüngda yimjung aser putepa aliba nung timtem agütsürtem aitsür ta KU-i ashi.

"Tesüiba küm ter tsüngda Konyak aser Assamese nunger tsüngda yimjung nung dang lia arur aser kidanger tajungtem ama tatalokba tamajung kecha melii dang arur. Kanga meranga inyakba ajanga yimjung nung alir aser iba ya kati ka

angatettepba aser akhümsütepba ajanga lior. Anungji kija mesüra telok shingaia iba nung timtem magütsüsüla aser putepa aliba meraksatsüsüla" ta Konyak Union-i sangdong ka nung ashi.

Nisungkar den ken okar adokra pur aoba agi masü saka ozüng nung lateta aliba ama inyaktsüla kechiyong nisung pur aoba ajanga tensa mejugi kümdaksür aser temulung melemtep adokdaksür ta parnoki ashi.

"Tensa mejungi akümba ajanga timtem adoker aser kaketshirtem den shirangertem senzusenbongba nunga tetsükdaksü ajurur. Iba ajanga telok anaprong dak kongshir anungji Assamese nunger sendaktepa alirtem aser lennirtemi asenok tsüngda putepa aliba meraksatsü atema arenzüka atatsü ayongzükur" ta Konyak Union-isa metetdaksüogo.

## 25 buba Hornbill Festival atema sentong ajak renemogo: Minister Imna Along



Kohima, November 29, 2024 (TYO): December 1 nikonkdang 4:00 ako nungi anogo 10 nü 25 buba Hornbill Festival tenzüksü ta Tourism and Higher Education Minister, Temjen Imna Along-i ashi.

Iba benjung ya Nagaland atema kanga tongtipang asütsü aser Naga sobaliba den tapu aika alima dang sayuts, ta Honibarnü Tourism Department office nung Minister Along-i osangbener dang ashi.

Benjung lapokba sentong nung partner countries 4 nungi ambassadors den tanga tongti ketdangsurtem adentsü. Iba sentong atema Nagaland Governor, La Ganesan-i chief host aser Chief Minister Neiphiu Rio-i host ama shilem agitsü. Külen Minister Along-i festival host ama shilem agitsü.

25 buba Hornbill Festival nung A.R. Rahman-ia tetushi süa jaoker ka ama shile agitsü.

Benjung lapokba sentong nung Kohima Village Head GB Medo Keretsu-i sobaliba temoatsü meshitsu aser TaFMA-i centre stage nung sentong balala agitsü.

"Küm 20 tejakdang tenzükba Hornbill Festival ya

Naga nunger sobaliba benjungtepba dang masü saka global cultural exchange, networking, aser investment opportunities atema tongti sabang ka kümogo" ta Minister Along-i ashi.

Iba benjung ajanga Nagaland-i alima den sendakteper aser linük pezü-United Kingdom (Wales), United States, Japan, aser Peru ajanga country partners ama shilem agitsü. Maneni, Sikkim aser Telangana-ia state partners ama shilem agitsü aser Ministry of Tourism and Culture nungi teshimtet telok ka arutsü, ta pai metetdaksü.

Taküm benjung nung business aser commerce roundtables alitsü ta Advisor to Chief Minister & IDAN Chairman, Abu Metha-i ashi.

Iba benjung ya Nagaland-i tourism, infrastructure, aser technology wadangtem nung tesentaktep yangluba maangka ka ama züngshir, ta pai ashi.

25 buba Hornbill Festival nung Hornbill Parade yanglushia nungtu Night Bazaar den lokteptsü aser December 7 nü schools, civil society, o paramilitary forces dena

carnival mesüka agitsü ta Metha-i ashi.

Taküm Kisama nung busking events, Dimapur nung music festivals aser textile pavilion ka nung India'er handloom & handicraft sayutsü ta pai ashi.

Hornbill Festival ulushia taküm Kohima, Dimapur, aser Wokha dena Nagaland kübok tesem balala nung sentong balala agitsü ta paisa shisem.

Taküm Hornbill Festival ajanga Rs 200 crore tema aazüksü imlar aser iba ajanag wadang balala nung nisungtem ajangzüksü, ta Metha-isa ashi.

Iba benjung ajanga permanent aser semi-permanent jobs 8,500 tema adoktsü ta government-backed economic report ajanga ashir.

Taküm benjung atema tongtipang shilem kaji amphitheater tasen yangluba asütsü aser iba nung nisung aika adenshitsu akok. Iba amphitheater nung Indian Institute of Technology (IIT) nungi mongintemi agizükba pre-engineered structures enoka lir, ta Metha-i metetdaksü.

Iba amphitheater nung nisung 5,000 amentsü akok aser tongtipang sentongtem ayonga agitsü. Minister Along-i Nagaland nung alirtem dang Hornbill Festival ya pei meyong ama bilemstsü ayongzük.

Iba benjung takok anguba ya Naga nunger ajak külemi inyakba ajanga lir aser asenoki alima dang asen sobaliba sayuba den yimyatsütajung sayudi ta pai ashi.

Abu Metha-ia tourists aser delegates ajak dang yimya tajung sayutsü aser parnok Nagaland nung arua amongba kodanga mamadoktsüsa yariteptsü ayongzükogo.

Hornbill Festival ya Naga sobaliba benjungtepba dang masü saka alima sabang nung Nagaland ajungketba mapang ka lir ta paisa nenshia metetdaksü.

## Hornbill Festival atema security akangakanga renema lir

Kohima, November 29, 2024 (TYO): Nagaland police-i Hornbill Festival atema tongti tesentepdak Kisama Heritage Village tongti ser security ecosystem akangakanga renema lir.

"Onoki lendong ataloktsü meimlar saka 3-tier security renemogo" ta Additional Director General of Police (ADGP) Nagaland, Renchamo P. Kikon-i ashi.

Benjung nung drugs bener aruba noktangtsü atema Nagaland nung inter-state border aser international checkpoints ajak akangshigo ta pai ashi.

Police dak alia tesem

tongtipang kar nung security personnel mapa lemküksüogo aser Department-i Dimapur o Kohima nung tourists yaritsu atema tourist police agütsüsü ta Renchamo-i ashi.

Gate No. 2 nungi main venue telungi prangpong tajung amba security guards meyoktsü ta ADG-isa ashi.

VIP aser VVIPs atema security personnel ajak civilian süoshi asemtsü aser miima prangpong tilalatem abentsü ta paisa shisem.

"Hornbill festival ya Nagaland atema konang ka lir aser state o linük adena orr alirtemi arua adener aser iba

mapang parnoki timtem kecha majurutsüla" ta ADGP Sandeep Tamgadge-ia ashi.

"Escorts anir aruba VIP aser VVIPs ajak dang Gate No. 2 adena security personnel meyoktsü osang yoktsü. Tangalen nungi arurtem dang prangpong abener uniformed personnel aika mesayunür" ta pai ashi.

Hornbill Festival nung traffic timtem ajema kümdaksütsü atema traffic tetuyuba aika agütsüogo ta Additional SP (Traffic) Kohima, Tshurhosie Kajiri-ia ashi.

Benjung amongba piyong anepdang 7:00 ako nungi

aonung 10:00 ako tashi khu abenba garitem mesenzükdaksütsü. Kisama-ia aoba lenmang aser Night Carnival area nung ROW benshitsu, ta Kajiri-isa ashi.

NH-2 nung Gate No. 1 nungi Kisama telungi car passes maliba garitem maitdaksütsü aser parnok Kigwema Ground-i yoktsü, ta ADGP Kikon-i ashi.

"Kohima district administration aser police-i Kisama tashi senzüba aser anogo 10 Night Carnival atema traffic tetuyuba agütsüba sülen nisung ajaki anidaksü ayongzükur" ta paisa ashi.



## Taxes Colony, Dimapur nung Flat-type staff quarters semzük



**Dimapur, November 29 (TYO):** Taxes Colony, Dimapur nung tang tasen yangluba Flat-Type Staff Quarters November 29 nü Advisor for Taxes and Civil Administration Works Division (CAWD), Kudecho Khamo-i semzüksüogo.

Iba sentong ya sorkari mapa inyakertem taküm jenjang tajungba kümdaktsütsü nükjidong nung inyakba alizüng ka tongtetba lir.

Iba sentong nung jembidang Khamo-i iba project takok ngua tembangba atema Chief Minister Neiphiu Rio aser Er. Ketousielie Kengurusie, Executive Engineer, PWD (H), Estate Division, Kohima-i aniba project team dang pelaba lemstaep.

Paisa, iba project renemtsü atema mapang atemzuka aliba dang nungi kanga tekeraba iba project tembangba atema M/s Flowmore Construction nungi

Wabang Changkiri dang pelaba lemsatep.

Khamo-i Nagaland rongsenkettzung tashi itshtisü atema tax administration tashi itta alitsüji kanga tongtibang, ta ashi.

Paisa, State Taxes Department ya saru bendenba tongti body ka lir aser 2023-24 kümsük nung parnoki sen crore 1,356.91 sarutetogo, ta metetdaksü.

Saru adokdaksüba tsütsü timtem aika lir, 2024-25 kümsük atema sen crore 18,034 nungi saru shilem 12 dang internal saru lir, ta shia pai department nung ketdangsertem dang ano taliba nendaka inyaktsü ayongzük.

Kasa sentong nung Er. Ketousielie Kengurusie-i Flat-Type Staff Quarters indang technical report metetdaksü. Ponguben amentepa asüba RCC residential building ya ali tazazük 25,000 square feet nung

asü; iba building nung flat 16 lir: two-bedroom units 10 (900 sq. ft. each) aser three-bedroom units 6 (1,200 sq. ft. each) lir.

Kasa building nung gari 20 tashi anentettsüsa parking lir, passenger lift ka, borewell ka aser tzü litre lakh 1 tashi rizünga yutettsüsa underground water tank ka lir.

Iba project ya shilem ana lemsar sen crore 9.15 indoka yanglu. Mezüngbuba shilem 2020 küm March ita nung tenzuka sen crore 4.73 indoka ki tamendakdak, ground floor aser first floor yanglua August 2022 nung tembanga liasü.

Tanabuba shilem 2022 küm August ita nung tenzuka sen crore 4.41 indoka second floor aser third floor yanglua taküm September ita nung tembang, aser ibaji mapang atemzuka aliba dang nungi ita ter jelia renem.

Kengurusie-ia mapang shidak nung mapa renemba atema M/s Flowmore Construction dang pelaba lemsatep.

Iba sentong tenzuka Lotha Baptist Church, Diimapur nung senior associate pastor, Dr. Yanbemo-i sarasadem aser tetushi tejaokeri iba building semzüksü.

Sentong lenir, Special Commissioner of State Taxes, Y. Mhathung Murry-i lokti pelaa agizük aser M/s Flowmore Construction nungi Wabang Changkiri-ia o tatsüka jembia liasü.

Tesüsa Additional Commissioner, State Taxes, Nagaland, Dimapur, Lima Imsong-i tepela anküp o jembia aser Yimkhiung Baptist Church, Dimapur pastor, Rev. Dr. Athsan-i sentong tembanga sarasadem.

## Sambhal nung tatalokba bushisüngdangtsü atema commission ka tentetogo

**Lucknow, November 29 (Agencies):** November 24, 2024 nü Uttar Pradesh kübok Sambhal nung raraba tatalokba bushisüngdangtsü atema Uttar Pradesh Angh, Anandiben Patel-i züngsem aseme akümba judicial inquiry commission ka tentetogo.

Iba commission dang, iba sangdong agütsüba anogo nungi tenzuka ita ana tsüngda bushisüngdangba tembanga report agüjang ta tuyuogo.

Mapang atsülangtsüsa süra sorkar dang nungi temelaba meshitsüsa akümtsü.

Court kati Sambhal yimti nung aliba Shahi Jama Masjid survey agitsü tuyuba sülen rara adoka nisung pezü asü aser police densema nisung aika yirua liasü.

Mapang ka nungbo iba tesem nungji Harihar tekülem ki liasü, ta shia temepishiba ken o agütsüba sülen court-i survey agitsü tuyua liasü.

Iba commission nung tongtiji Allahabad High Court nung retired judge, Justice Devendra Kumar Arora asütsü aser züngsem anaji retired IAS officer Amit Mohan Prasad aser retired IPS officer, Arvind Kumar Jain na asütsü, ta sangdong nung shia lir.

Tensa azüoktsü aser tarutsü nungbo item ama tatalokbatem nokdangtsü atema commission indang report ji kanga tongtibang asütsü, ta sangdong nung shia lir.

## INDIA teloktep nung lenirtemi Delhi nung longkak aittsü

**New Delhi, Yimpoksüi/ November 29 (Agencies):** Manipur Congress Tir, Keisham Meghachandra-i, opposition INDIA teloktep nungi lenirtemi New Delhi nung longkak aita Manipur nung yimjung atema takhangba agütsütsü, ta metetdaksü.

“State sorkari state nung kodang rara anendaktsütsü atema sentong yanglur? Kechiba parnoki rara melar? Assembly nung yimtenren lenirtem aser

tangartemi bangdak lenirtem dang ken o jembitsü atema mepishir saka tanü tashi kecha mataloker,” ta Meghachandra-i osangbenertem nem metetdaksü.

“Onoki yimtenren party balala ajak senden amentsü ayongzükogo aser Ato kilonser dang state semdangtsü mepishiogo. Manipur nung tensa tamajungba akümba ya sorkari nüburtem ola mangaba agi lir,” ta pai ashi.

Meghachandra-isa state nung mapang shia shisaliok rejutem shibangdaksüba aser internet nokdangba atema Chief Minister N Biren Singh den minister tem aitsü.

“India teloktepi national lenirtem den longjemer Delhi nung longkak ait tenzüksü telemtetba agiogo, taruba hopta ayongzüksüsa akok. Onoki iba sentong renemdar aser kobi melii team ka Delhi-i aotsü,” ta paisa metetdaksü.

## Kma DC-i HoD ajak dang Statehood Day sentong nung adentsü metetdaksü

**Kohima, November 29 (TYO):** Deputy Commissioner Kohima, Kumar Ramnikant, IAS-i sangdong ka ajanga Kohima HQ aser Kohima Sadar (Urban & Rural) kübok

aliba Head of Offices (HoD) ajak dang December 1 nü Nagaland Civil Secretariat Plaza, Kohima nung ayongzükba 62buba Statehood Day sentong nung adentsü metetdaksüogo.

## NSLSA indang Legal Services Stall semzükogo

**Kohima, Yimpoksüi/ November 29 (TYO):** Hokolbarnü Kisama nung Gauhati High Court, Kohima Bench, Judge, Justice Budi Habung-i 25buba Hornbill International Festival atema Nagaland State Legal Services Authority (NSLSA) indang Legal Services Stall semzüksüogo, ta ketdangsertemi metetdaksü.

Iba stall semzüksüba sülen jembidang Judge Habung-i, iba stall ya ajanga Legal teyari nungdakertem nem service balala agütsütsü, ta metetdaksü.

Paisa, awareness agütsütsü aser maparen balala inyakshangshitsü atema anogo 10 nüji teperi, ta shia pai panel lawyers dang stall nung service agütsüba den külemi legal

literature agüjang, ta mepishi.

Kasa sentong nung NSLSA Member Secretary, Neiko Akami-i küm shia hornbill festival nung agiba sentongtem aser service balala agütsüba indang metetdaksü.

Legal Services Stall nungji legal services tapu aika angati angutsü- affidavits file asütsü, legal teyari agitsü atema advice agütsütsü, Legal Literature aser booklets agütsütsü aser Legal counselling agütsütsü.

State and District Legal Services Authority nungi panel lawyers dak alia N Longshithung Ezung, NJS aser Chief Judicial Magistrate aser Secretary Kohima DLSA Phuleto Yeptho, NJS nata alitsü.

Kasa sentong nung Kohima Law College-i ‘Domestic violence’ indang jilushi ka ai.

## Indus Creed-i Toyota Hornbill Music festival nung shilem agitsü



**Kohima, November 29 (TYO):** Trailblazers of Indian Rock- Indus Creed-i 25buba Toyota Hornbill Music Festival 2024 nung December 6 aonung Main Arena, Naga Heritage Village, Kisama nung shilem agia ken atentsü.

Indus Creed ya India nung rock band tajungtibatem rongnung ka lir; iba telok ajanga

India nung rock music meimertem kanga ajungmesor. 1984 küm mezüng parnoki ‘Rock Machine’ nungja nung iba telok tenteta liasü aser 1993 küm ‘Indus Creed’ ta melen.

Western rock den külemi India nungertemi meimtsüsa music yangluba ajanga parnoki jenjang tajung angu aser parnoki sapur jenti lir.

## Hornbill Festival atema consolidated helpline numbers agütsüogo

**Kohima, November 29 (TYO):** 25buba Hornbill Festival atema Kohima Deputy Commissioner, Kumar Ramnikant IAS-i ozüng benokba agencies aser tongti stakeholders indang consolidated helpline numbers sangdongogo.

Item helpline numbers ya benjung mapang nung raliwalirtem aser lisopurtem yaritsü atema lir, talisa osang metetetpelaba, tashishiba agütsüba aser tanga nungdak balala nung yariteptsü atema helpline numbers lemsateper.

Helpline numbers ji yamai lir:

1. District Administration: 6909619234 / 9774526147
2. District Police: 7005986005 / 6009308084
3. Tourist Police: 070-2242511 / 8794833041
4. Tourism Department: 8413859112 / 9863819242
5. Nagaland State Transport, Kohima: 7005878828 / 8837394538
6. Kohima Hotels & Restaurants Union: 9774028992 / 8118924953
7. All Nagaland Taxi Association, Kohima: 9436694693 / 6909015501
8. All Nagaland Two Wheeler Taxi Association: 6009693151 / 9862741160
9. City Bus Owners Union, Kohima: 8837078836 / 98562644100



# Cyclone Fengal tesashiba akümba sülen Tamil Nadu kongshitsü



November 29, 2024 nü Tamil Nadu kübok Tiruchirappalli nung angopurtem tükümi meyipa arudang tangokba noksa nung angur. Cyclone Fengal agi Tamil Nadu tzüymkümlen kongshitsü anogo ka dang lia India Meteorological Department (IMD)-i angopurtem dang angopui tzüyimi maotsü tekümdangtsü metetdaksüogo.

**New Delhi, November 29**

**(Agencies):** Cyclone Fengal ano tesashiba akümba mapang nung Hokolbarnü Chennai aser Chengalpet na nung school/college ajak shibangdaksü.

Cyclone Fengal ya maneni taruba ghonda 24 tsüingda ano tesashiba akümtsü; tang iba yipru ya Bay of Bengal tzüyim nung lir. Iba yipru ajanga taruba

anogo 2-3 tzüinglu sashia arutsü aser Tamil Nadu nungbo tesem teimbaka nung tzüinglu sashia arutsüa akok. Osangbenertem den jembidang Tamil Nadu nung

Home minister, A Namassivayam-i, tzüinglu sashia arutsü anungji Hokolbar nungi tenzüka anogo ananü Puducherry aser Karaikal region na nung school ajak shibangtsü, ta metetdaksü.

Iba cyclone tesashiba akümba sülen Indian Navy-i disaster response team ka tentetogo. Ketdangsertemi angopurtem danga November 31 tashi angopui tzüyimi maotsü tekümdangtsü metetdaksüogo.

Hokolbarnü India Meteorological Department (IMD)-i, Bay of Bengal nung aliba yipruji November 30 nü Tamil Nadu aser Puducherry na tsüingda tzüymkümlen süitsüa akok, ta metetdaksüogo.

Hokolbarnü Weather office-i, “Iba yipruji Sri Lanka nung northeast of Trincomalee nungi kilometer 240 pilar lir; Nagappattinam nungi kilometer

33; Puducherry nungi kilometer 390 aser Chennai nungi kilometer 430 pilar lir, ta metetdaksü.

IMD-isa, “Iba yipruji northwestwards tsütsüleni aotsü aser November 29 tashi nung sashia akümtsü.

November 30 anepdang iba yipruji maneni northwest tsütsüleni aotsü aser Puducherry anasa Karaikal aser Mahabalipuram tsüingda north Tamil Nadu-Puducherry tzüymkümlen atongtsü, aser iba mapang nung mopungji ghonda ka nung kilometer 45-55 nungi kilometer 65 tashi kera aontsü,” ta metetdaksü.

Hokolbarne Chennai yimti aser yimti temeket nung tzüinglu kanga aruba den külemi kanga temekong liasü.

## Parliament nung rongrong adok; Hombar tashi senden thinenogo

**New Delhi, Yimpoksüi/November 29 (Agencies):**

Hokolbar tashi nung anogo pezünübuba Parliament nung opposition party temi Sambhal nung mosque survey, Manipur tensa aser Adani Group nem ochimashi tai tonglokja aliba onüktem nung o lemteptsü takhangba agütsüba ajanga senden nung rongrong adokba ajanga senden junga magiteti Hombar tashi senden thinenogo.

Hokolbarnü Lok Sabha aser Rajya Sabha naprongla nung Opposition züingsemtemi longkak aitba mapang nung Hombar tashi senden thinen.


Hokolbarnü anüingdang 12:00 ako nung senden asentenshir tenzüka saka opposition-i item onüktem nung o lemteptsü takhangba agüja rongrong adokba mapang nung senden thinen.

Lok Sabha nung Speaker, Om Birla aser Rajya Sabha nung Chairperson, Jagdeep Dhankhar nati Rule 267 kübok notice 17 prongla magizük.

Senden thinenba sülen Congress MP, Karti P. Chidambaram-i, “Sorkari temelung ulur kanga tongtibang onüktem benoktsü atema Opposition nem temelaba agütsütsü, ta ni imlar. Opposition nem parnok tebilemba lemsadaksütsü atema sorkari lenmang ka bushitsüla aser sorkari parnok melung inyakttsü akok,” ta ashi.

Samajwadi Party nungi MP, Dimple Yadav-i, Sambhal nung rara adokba atema sasa bilemstür; iba tatalokba ya jungjunga bushisüingdangtsüla, ta ashi.

“Iba ya jungjunga bushisüingdangtsüla. Iba ya kanga tongtibang onük ka lir. Supreme Court-i ketdangtsüa iba ya jungjunga bushisüingdangtsü, ta ni teimla akar,” ta lai ashi.



## PROGRAMME FOR CELEBRATION OF 62<sup>nd</sup> Statehood Day

AT NAGALAND CIVIL SECRETARIAT PLAZA, KOHIMA

0850 Hrs	: Parade Review by DGP, Nagaland												
0900 Hrs	: Hon'ble Chief Minister arrives, takes the General Salute and inspects the Parade												
	: Address by the Hon'ble Chief Minister												
<b>March Past</b>	<table border="0" style="width: 100%;"> <tr> <td style="width: 50%;">1. 1<sup>st</sup> NAP Bn.</td> <td style="width: 50%;">7. 15<sup>th</sup> NAP (IR) Bn.</td> </tr> <tr> <td>2. 5<sup>th</sup> NAP Bn.</td> <td>8. Village Guards</td> </tr> <tr> <td>3. 7<sup>th</sup> NAP Bn.</td> <td>9. NPTS Central Brass Band</td> </tr> <tr> <td>4. 10<sup>th</sup> NAP (IR) Bn.</td> <td>10. Mahila Pipe Band</td> </tr> <tr> <td>5. 12<sup>th</sup> NAP (IR) Bn.</td> <td>11. Nagaland Police Auxiliary Brass Band</td> </tr> <tr> <td>6. 13<sup>th</sup> NAP (IR) Bn.</td> <td></td> </tr> </table>	1. 1 <sup>st</sup> NAP Bn.	7. 15 <sup>th</sup> NAP (IR) Bn.	2. 5 <sup>th</sup> NAP Bn.	8. Village Guards	3. 7 <sup>th</sup> NAP Bn.	9. NPTS Central Brass Band	4. 10 <sup>th</sup> NAP (IR) Bn.	10. Mahila Pipe Band	5. 12 <sup>th</sup> NAP (IR) Bn.	11. Nagaland Police Auxiliary Brass Band	6. 13 <sup>th</sup> NAP (IR) Bn.	
1. 1 <sup>st</sup> NAP Bn.	7. 15 <sup>th</sup> NAP (IR) Bn.												
2. 5 <sup>th</sup> NAP Bn.	8. Village Guards												
3. 7 <sup>th</sup> NAP Bn.	9. NPTS Central Brass Band												
4. 10 <sup>th</sup> NAP (IR) Bn.	10. Mahila Pipe Band												
5. 12 <sup>th</sup> NAP (IR) Bn.	11. Nagaland Police Auxiliary Brass Band												
6. 13 <sup>th</sup> NAP (IR) Bn.													
Parade Commander	: Shri. Akihito Sumi, NPS, Dy. Commandant, 1 <sup>st</sup> NAP Bn.												
Second-in-Command	: Kmr. Mhalezhunuo Chielie, NPS, Dy. SP (Prob.) attached to CMS, PHQ												
<b>Launching/Laying of Foundation Stone by the Hon'ble Chief Minister</b>													
	1. Launching of Teacher Attendance Monitoring System (TAMS)-SMILE App												
	2. Laying of Foundation Stone virtually for 7 (seven) Light House School Complexes (LSCs) under NECTAR Project												
	3. Launching of Smart Secretariat												
<b>Special Presentation</b>	1. Rengma Chorale, Tseminyu 2. Vingving tii (Sangtam Cultural Group)												
<b>Cultural Troupes</b>	1. Sumi Cultural Troupe 2. Khamniungan Cultural Troupe 3. Phom Cultural Troupe 4. Angami Cultural Troupe												
<b>Inauguration of Exhibition Showcasing Activities &amp; Achievements of the State by the Hon'ble Chief Minister</b>													





# TIR YIMYIM

YIMOBILEM (EDITORIAL)

DIMAPUR

KÜPTOKNÜ

YIMPOKSÜI 30, 2024

## Akshi machi maremtsü !

**A**senoki achiba shi rongnung, temang atema, akshisa tamajungba. Ibayongji, tejen putu mapang Tsüngremia nisungtem dang akshi machitsü özüng agütsü südi. Ajisüaka, nisunger yimya nung kechi nung ta ashir ajisa teinyaknuba aser kechi techi aser tejem ta ashir, itemjisa techinüba aser tejemnuba. Aji oda, shi rongnung tamajungba aser Tsüngremia achitsü memelaba ak shi-ang asenokia techinüba, anungji asenoki ak shi machibo meliteter. Ano talisa, ak shi ya tang ama benjongbentsü mapang arudangsa tenüngdakba akümer. Ajisüaka, asenok asoshi takoksa kaji, asenoki asenok peri ak memetsüteter, anungji tzümalen nungi bener aruba aksa ak lepa benjong amonger. Ajisüaka, tsümalen nung ak metsüba 'farm' ji kechi koma-ar asenoki mangu aser memetet. Aji oda, ak farm tulu nung ak meyrirjang dak tali nem anogo shia chiyongtsü agüja mesütsüba mapu tulu aser tasak, anungji ak tebok asüngtsü asoshibo chiyongtsü mashi bener arua agüja alitsü, kechiyong ak-i machitsü kecha maka. Iba jagi temang asoshi ak shisa tamajungba akümer. Atangji, asenokia ak metsür saka asenokibo shibanger metsür aser chiyongtsü tajung süngolemba dena bushia chidaktsür, anungji tzümalen metsüba aktem den medemdangra asenoki metsüba ak shisa tajungba asütsü. Ajisüaka, ak metsütsüba ya temela masü, anungji senotsü tajangzük angutsü bilema ak farm lapokba nung nisung aika takoksa angur. Ano, tang Sivasagar len amaji mapang mapang shia aksüra arur, anungji meshirangtsü mozü agütsür liaka ak aika mekümzükteetsüa shirangadoker. Aji oda, Sivasagar len aksüra aruba agi asen Ao lima nunga ak shi mangutsüsa akümer, kechiyong asenoki achiba ak ajak ya Assam len nung jagi bener atur. Item tebilemtsü aser nüngdak ya kodang bilemdangdir, asenoka ak metsütsüba nung ya lanurtemi khen asentenshir temulung agütsüra, tebilemtsü agi temoatsü akümtsü ana nung lir. Aji oda, alima nung senotsü ajangzüktsü atema inyakba mapatem rongnung tajangzük ngua inyakba mapu tajungtem rongnung chiyongtsü ayokba 'business' ya ka lir. Chiyongtsüji tazü ayoktsüa akok mesüra tamen ayoktsüa akok, item ajak nungji tajangzük lir. Tangarbo aluyimtsü aser shiruru metsütsü asoshi tebilemtsü tulutibaji ali lir, saka asenokbo aluyimtsü aser shiruru metsütsü asoshi ali makaba tebilemtsübo mali. Aji oda, ak metsütsü bilema tamasa ak-i achiba chiyongtsü lu yimra asenoki ak kanga junga metsütettsü. Iba ama sentong atonga kodang asenoki mapu ka tenzükdir, anogo süitema memetet, asen mapu nung anogo shia inyaktsü aser memeteti asenok takar kümer alitsü. Ak tetsüibo ak chanu aika mepur, anungji lanur kati par meyong ak farm nungi küm nung sen meyrirjang semer agi ak tenem yokra, küm nung sen lakh 15 arur asütsü, iba nung jagi sen lakh terbo tajangzük alitsü. Iba mapaji tanü asüng zünga meteter lanur ka asoshi tasak mali. Kodang asenok lanurtemi iba ama shiruru metsüba mapu tenzuka inyakdir, shiji tajung asütsü, anungji yimten nung jenjang atakertemia jenjang kangabo mezüreptsüi metemeteta tajangzük agidaktsütsüsa ak shi jenjangji junga latettsütsüla. Iba jagi dang asen nisung aser asen lima takar akümtsü. Aji oda, asen lima nung ak mangur ta shisabolua ak yima jajaba tensaji lanurtem asoshibo teinyaktsü mapu bentsür arur amai bilemtsüla. Mapu tetezüji tangar makaba ka yanglutettsü aser tangar nüngdakba ka züsenteta ayoktsü ta asübaaji lir. Aji oda, asen nübertemi ak shi kanga chinür saka peria mangur ta asübaaji asen dang asen inyaktsüba mapu sayur ta lanurtemi agitsüla. Tangbo joko akshi yabo asenoki dang masü saka asen lima nung alir tsümartemi dena kanga sapua achir. Iba asenok asoshi aseni metsütetba akshi ayokdak tesem tajung ka lir. Atangji, asenok kibong aikati kidang chiyongtsü anüngalu chidaktsütsü asoshi ak ka mesüra anabo puoka ajeper, ajia asenok asoshibo tajangzük tulu lir. Ajisüaka, tanü lanurtembo akhidang nungi tsüraburtemi pei kidang ak ka ana puoka metsüba sobaliba dang nungi tuluba aser talangba atendanga oa bilema, takokeribo Veterinary doctor kümer peisasa shiruru farm lapoktsüla aser Veterinary-sa mazüngyonga tanü asüng lanurtemi shirurubo metsütettsü.

# OLEMSABANG

## NLTP Act : Kechi nung tamakok ?

Rev. Dr. N. Lipok Jamir, Pastor,  
Ao Baptist Church, Diphupar

(Yashi adok nungi...)

Ajaki metet NLTP Act tamakok nung lir. Süra ya shir tamakok? Arogoi ayonga iba ACT ya passed asüji Arogoa iba tamakok nungji shilem tulu lir. Saka tejangja temetettsü kaji Arogoji özüng beshiba telok masü. NLTPA nung teinyaktsü tashi bena aliba telokji sorkar dang, Arogo masü. NLTP Act nung tapak 22 lir, aser ocet/section 85 lir; item 85 nungji Arogo ta beshiba ojang kata mangutsü. Anungji, Arogo kisüng aitsütsü nüngdak madoker.

Kü tangatetba nungbo NLTPA ya tamakok ta züngshitsüa madoker, kechiaser NLTP Act nung teinyaktsü ocet 85 nung jenjang kar kübok yi amshitsü melaa aliba tongtibangsa Chapter II section/ocet 12-20 tashi nungji angur; itemjibo tesüngmangtsüka beshiba angur. Saka yi nokdangtsü asoshi agüja aliba ocetbo/section-bo ka danga mebenshidang. **Tongtibang kar shidi:** NLTPA chapter I-p.1 (7), Chapter III-p.7 (25) nung Director of Prohibition shimtsü, (26) Prohibition Officers shimtsü iba den Chapter III-p.7 (27) nungsa Prohibition Council State level nung aser Prohibition Committee District level nung shima inyaktsü shia lir. Saka tanü tashi item Officers aser Committee shimba mali. Tetezü yi nokdangtsü Act-ji teyangludang yanglu ashi mebenokdang.

Anungji NLTPA nung tamakokji **mebenokba tamakok, mebenshitetba tamakok masü.** Atangji NLTPA ya tamakok ta ashitsü kuli peria lir ma? Mesüra NLTPA ya agientsüla ta kuli peria lir ma? Yi nokdangba section/ocetbo kata benoka mebenshidang nung kodaser takok mesüra tamakok indang jembitsü mesüra agientsü indang jembir? Tamasa beshidanger ang takok mesüra tamakok indangji jembitsü tim; aser kuli peria ngura agientsüjia kuli jagi bendangtsü. Ashiko tawa NLA session nungjia asen lenirtemi Act-jibo mezüngdangidang jembir alitsü ta sasa bilemtsür, kechiaser shinga tebang nungi Act nung kechi zülua lir iba indangjibo süoka jembiba mangashi.

Ya khen jungjunga bilemdangdi, NLTPA-ji agien mesüra semdangtsü (*revisit*) ka asünunga medical department renema lir ma? Police department renema lir ma? Excise Department renema lir ma? Legislature kati yamai ashi, "Naga lima rangben asoshi Excise personal 336 dang lir." Item rongnungji 40-bo shima mali. Item jagi iba mapu tulu jeta bener aotsü kokdi ma? Külen NLTPA-ji agienra yi ayoktsü temelaba (*license*) shirnok nem agütsütsü? Tang özüng anema yi yanglur, ayoker, belener (*Bootleggers*) jenti lir. Item ajakji license mangutsü, itemji koda asütsü? High level syndicate tenzüktsü aser US aser Italy etc ama nung özüng anema sashia inyaker **Mafia-tem** ama tamajung mapu inyaker telok tentettsü ana nung lir. Teraksaji tanen maka tuluba akümtsü. Idangji tarutsü generation kwika tembangtsü. Tesasatsü anogotem arutsü ana nung lir.

Atangji, shisemba ama NLTP Act tamakok indang jembiba ya tanga masü saka **mebenokba tamakok lir; benokdang mebenshitetba tamakok masü.** Anungji Nagaland sorkari iba Act ya nendaknendaka benoker özüng shitak amshia inyaktsü tenüngdaktsü. Ochiba shisatsü bener pei nübur aser pei lima meima inyakra iba Act ajanga Naga lima nung kija, kibong aser lokti tesama jenjang nungi kümzüktsü lenmang sadema lir. Anungji, Government-i anir nübur ajaki iba Act mapu kuma benoktsü, aser Arogoia NLTPA agientsü indang jembidang dang ola madoki rongsen aser nübu endok mesasai iba tongpang asoshi tashi ajak agi inyaktsü tenüngdaktsü ta kü shisa tila agi atongba lemsateper.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Nagaland Christian Ministries Association telongjem sentong agi



**Dimapur, Yimpoksüi/ November 29 (TYO):** Nagaland Christian Ministries Association (NCMA) Annual Get Together senden November 28, 2024 anogo nung Dunamis Life Church, Walford, Dimapur nung agiogo.

Iba sentong nung taoba mapang NBCA nung executive secretary, Rev. Dr. R. Meren Jamir aser Wt. Khunitoli Moon Pastor, Withee Diaspora Mission Church Dimapur nati Tsungrem O jembia temoatsü angu.

NCMA Tir, Rev. Dr. Olem Jamir ajanga Association-i 2013 nungi inyaka aruba lemsatop.

Iba senden nung lenir ajak lonjemer Naga lima nung Ministry aser Prayer Centres kari meshidaki inyakba ajanga tenung menüktsüba indang jembia liasü.

Ministry tenzükeri Tsungrem nungi tajaba tejangja meteta Laishibai sayuba ama inyaktsüla, ta parnoki

bangjema liasü.

Koba kin südir süaka meshidaki mesüra Laishibai sayuba ama Ministry ji mesüra Prayer Centres ji meinyakra iba Association ajanga Naga nung tamangba nung aibelen masutsü asoshi ola adoktsü, ta renema jembia.

Kechiaser Tsungremer wadang kaji tejangja tamenokdak kar tim-tesü agi Lai O i sayuba ama inyaktsüla, ta parnoki bangjem.

Iba senden nungsa, ano kija mesüra lokti kari ministry ajak majung ta anema mejembitsüla ta bangjema liasü kechiyong Nagaland nung aliba ministry ajakjibo majung masü.

Para Churches (Ministry) aser Arogo naji külemi teka amteper kati ka tsütsü yaritepba ajanga Tsungrem Yimli yangertsür, ta parnoki bangjem.

NCMA nung aliba Ministry balala aikati Arogoi meinyakba

mapatem inyaker, tekübok tia nung alir nüburtem den, metongteti alir den (unreached Non Christian) orphanages, leprosy ministry, medical Mission ama tapu balala aika inyaker aser item wadang ajanga nisung shi aser Tanela nung Khrista dangi anir arur, ta pai ashi.

Anungji külemi amalitepa kati ka manemtepi wadang inyakba ajanga Khristian jakla tajung sayur, ta paisa ashi.

NCMA ajanga Nagaland nung aliba Ministries tem nukjidong tejangja kar Tsungremi tuyuba ama inyaktsüla ta pai ayongzük.

Lokti kecha kübok densema maliba ministry mesüra Prayer Centres, Arogo mesüra loktitemi NCMA nung register asütsü tejangraba lira email : [nagalandchristianministries@gmail.com](mailto:nagalandchristianministries@gmail.com) ajanga osang agia metetpelatsü metetdaksür, ta NCMA-i metetdaksü.

## ANO GO ABEN TSÜNGREM DEN

### Amanga sarasademba

"Aser amanga sarasademba nenoki kechisa meshidir ajak nenoki angutsü".

Mathi 21: 22.

Meshiba ajakji sarasademba masü, anungji asungdangba ajakbo mangur. Yakobi ashir, "Nenoki meshir saka mangur, kechiaser nenoki pei shi azü azüabong nung amshitsü aibelena meshir". Nisung kati sen meshir saka Tsungrem sentsüwangshi asoshi masü, tangar yaritsü atemaka masü saka pei azüabong nung amshir. Tenungsang Ken züluri ashir, "Ni kü mulungjang nung temenen bilemra, Kibubai kü sarasadem mangashitsü". Tsungrem tenzükdang kari temulungjang nung temenen bilema tenzükra, pai sarasadembaji Tsungremi melangzüksü. Anungji yangi telangzüba manguba sarasadem tapu ana agütsür.

Kaji asenoki Khrista tenung nung asungdangba. Iba nung asenoki Khristaji Kümtetdakba ta amangba dena lir, aser idakji Khrista tenung amshitsü temeten dena lir, aser Pa mulung lemtet tembartem lir. Anungji Pa tenung amshitsü temeten kar. Iba jenjang jagi chichiba Khrista sülen anidakertem asoshi tenangzükba metena kumdaksür. Tanga jenjang kaji ya, asenok Khrista nung alir, aser pa o asenok dak alir. Khristan shibai ochi nung anidaker, pa iba tenangzükba kirangboki maiter.

Sarasadem tenangzükba ajak temsüa kümdaksüba ka lir. Aseni asungdangba ajak o bendangerji Tsungrem asütsüla. Asenoki kanga dang nungdaka aginuba alitsü, saka ibaji asenok asoshi lendong tulutiba asütsü akok. Tsungremi tajung kecha asenok nungi sota mayur, saka koba asenok asoshi lendong Pai metet aji agi Pai magütsür, kechiaser Pai asenok meimer. Tenangzükba ajak nung ibai beshir.

## Khristan publishers atema MAI LittWorld 2024 ayonga agi



LittWorld 2024 Conference nung tangokba noksa nung angur.

**November 29, 2024:** LittWorld 2024 ya küm asem shia khen ayongzükba agir aser taküm-a Media Associates International (MAI)-i iba sentong ayongzükba November ita tetenzüklen Puebla, Mexico nung agiogo.

Taküm iba sentong ya "Publishing for Lasting Impact" omen nung ajemdaker agi.

Iba sentong nung shilem agir tesadang shibo arrshi küm 20 nungi 30 tsungdapurtem liasü,

ta MAI Tir, John Maust-i metetdaksü.

MAI nung Maust-i küm 26 tashi Tir inyakba sülen Heather Pubols-i pa melenzükogo.

Maust-i, MAI LittWorld senden nung adener Khristan publishing staffs aser kaket zülurtemi maneni training aser network nungdakba lemsatopogo, ta ashi.

Osangbener den jembidang Pubols-i, "Alima tesem balala nung Khristantemi Khrista osangtajung prokba tsütsü

kakettem aser kaket ken otemji tongtibang masü ama bilemer. Ajisüaka kin ka oshi nung züluba kaketji Khrista osangtajung proktsü atema low-tech messenger ka sütet," ta ashi.

Laisa, "Tang alima nung oshi 7,000 dak tali jembiba nisungtemi tang mezung pei oshi nung meyipzükba Laishiba angur. Laishiba azüngtsü atema kaket azüngba sobaliba nungdaker," ta ashi.

(Maneni tapak 8 nung...)

## NCCI-i Manipur nung yimjung atema inyaktsü ayongzük

**November 28, 2024:** Tang tamajungba kümogo.

anoo asentenshir Manipur state nung rara adokba mapang nung National Council of Churches in India (NCCI)-i state nung yimjung atema inyaktsü mepishigo.

Protestant aser Orthodox Khristan million 14 dak tali aliba

NCCI nung General Secretary, Rev. Asir Ebenezer-i, "Kibongtem raksatsüba aser nüburtem tetsübu nung aliba tensa kati menepogo," ta metetdaksü.

Tang iba ama tensa atema tejashi lemsatopa pai state nung Central sepai tali yoksemsü aser telok ajak densema yimjung atema jembia inyaktsü ayongzük.

"Yimjungji takoktsü, saka ken o jembitsü atema stakeholders ajak longjemtsü nungdak. Asükwä mongpu atongdang telok balala tsungda tangatettep kati arutsü asoshi Arogoia yaritsü melunga lir," ta paisa metetdaksü.

Tawa Jiribam district nung tetsür asem aser tanur asem relief camp ka nungi puer oa tepsetba sülen ano tensa

tamajungba kümogo.

Ano külen tribal organization 8 densema aliba Indigenous Tribal Leaders' Forum (ITLF)-i ashiba agi, Jiribam district nung Meitei züngsentemi Tenla ki pongu, school ka, petrol pump ka aser tribal ki 14 rongdoktsüogo.

Meitei teloki rongdoktsüba

Tenla kitemji Independent Church of India, Evangelical Free Church of India, Salvation Church, Presbyterian (Vaiphei) Church aser Evangelical Assembly Church indang Tenla kitem lir.

ITLF-i, "Manipur nung rara tenzüka sülen nungi tang tashi nung Tenla ki 360 dak tali rongdoktsüogo, aser ibaji ajanga iba ya yimsü dak sendakba tongbang ka ama repranger," ta metetdaksü.

Manipur nung tongti telok anaji Meitei nütsung teimba aliba Imphal valley aser Kuki nütsung teimba aliba hills lir.

Yaküm May ita nung rara adokba sülen tang tashi nung nisung 260 dak tali süogo aser niisung 60,000 dak tali jenshigo.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tir Yimyim

**Tasong**

(n) tetanglokdak, tamdak (base/ handle)  
\* Somomobo tasong nung amer achir.

**Tasotalir**

(n) yimkümer, senso tajung ( good citizen by blood, founding citizen)  
\* Tasotaliri pei lima kanga meimer.

**OLONG PAITEP # 6997**

1	2	3				4	5
					6		
	7						
				8			
			9				
	10	11				12	
13							
							15
				16			
17							
					18		

**TIPIEN :**

- 1. Yong oset ka
- 6. \_\_\_\_\_ im
- 7. Pei tasodak
- 8. Jara nung yangluba
- 10. Anü aliba mapang
- 16. Teshinem meimba shiruru- (5)
- 17. Nisung tabensa
- 18. Tali

**LANGTSÜNGLEN :**

- 2. Chiyungba oset
- 3. Ochi masü
- 4. Shimten
- 5. Nok agi ana aküm
- 9. Pei indang aküm
- 11. Tajatsü tim
- 12. Ajak/songjen
- 13. Metsüdaker lao
- 15. Iba mapang

**OLONG PAITEP # 6996 TELANGZÜBA**


**TIPIEN :**

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket, 14. Mangu,
- 15. Anünü, 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

**NAI-A YA METETTER MA**



Saudi Arabia nunger Rashid Al-Olayan-i comic book aser TV franchise The Walking Dead indang memorabilia balala 3,053 bendenba atema Guinness World Record ka yangluogo. Dammam nung alir Al-Olayan-i 2025 nungi Michonne indang action figures bendentsü tenzük aser pai par ki The Walking Dead museum ama kümdaktsüogo.

**Manipur: Imphal East nung AFSPA anema longkak ait**



Manipur kübok Imphal East district nung lungkak aiter temi Armed Forces (Special Powers) Act (AFSPA) agientsü aser Jiribam district nung tetsür asem den tanur asem tepsetertem aputsü takhangba agüja yimdong süa senzüba angur. Lamalai constituency kübok Nongada nungi Yorbang tashi parnoki lungkak aita kilometres 4.5 jaja. Lamalai constituency nung Meira Paibis aser local clubs ajanga iba sentong ayongzüka agiogo.

**Imphal, Yimpoksüi/November 29 (Agencies):** Manipur nungi Armed Forces (Special Powers) Act (AFSPA) agintsü, aser Jiribam district nung tetsür asem aser tanur asem tepsetertem aputsü khanga nisung meyirejang aikati Brehostibarnü Imphal East district nung longkak aitogo. Iba rally ya Lamalai constituency kübok Nongada tesem nung tenzük aser longkak aiter temi yimyi ayima Yorbung tonga km 4.5 jaja liasü.

Longkak aiter temi rongnung tetsür kati ashiba agi, Lamalai constituency nung Meira Paibis

aser local club temi iba longkak aitba sentong ya ayongzüka liasü. "Onoki APSPA ya state nung aliba nüburtem tashiyim agi azüoktsü atema hadir ka ta shia aruogo aser iba ajanga Imphal Valley aser Naga nunger aliba tesemtem nung nüburtem kanga kangshidaktsüdar," ta lai shisem. Jiribam nung Coordinating Committee on Manipur Integrity (COCOMI) indang student wing nungi volunteer temi Kuki-Zo telungpurtem anema jenjang agitsü aser AFSPA agintsü khanga anogo ana longkak aitba mapang sorkar office tem aika shibangja liasü.

Volunteer temi sorkar tenzükertem office toktsür odaktsü aser office kishitem shibangja liasü.

Centre-i tawa Manipur kübok police station trok temeket nung aliba tesemtem nung AFSPA benokshio, kong Jiribam densema lir.

AFSPA ya, Imphal West district kübok Sekmai aser Lamsang tesem, Imphal East district nung Lamalai, Jiribam district nung Jiribam, Kangpokpi district nung Leimakhong aser Bishnupur district nung Moirang nung tanaben benokshio.

**Tripura CM-i Bangladesh nung Hindu nunger amakba anema jemb**

**Agartala, November 29 (Agencies):** Tripura Chief Minister Manik Saha-i, Bangladesh nung nütsüng agi ajema aliba lokti tentettem mamaktsü atema tekümdangtsü metetdaktsüba den parnok kümzüka ayutsü koda tongtibang iba indang lemsatapa liasü.

Saha-i ashiba agi, Bangladesh nung ataloker aliba ya international ken o ka lir aser India nung Centre nung lenirtemia iba ken o ya süoki

bilemba lemsatapa den item lokti tem kümzüka ayutsü atema mepishia metetdaktsüogo.

"Asenoki azüzüka inyaksangshitsü atema ayongzüksüla asre Bangladesh nung nütsüng agi ajema aliba Hindu nungertem kümzüka toktsütsü atema asüngdangtsüla," ta Tripura CM yagi ashi.

Pai ashiba agi, Tripura sorkari tensa kanga junga asadangdar aser state police

tekolakba dang ozüing alema India-i aiter temi aputsü atema arrtsü nung kanga kümküma meita atatsü tetuyuba agütsüogo.

Chief minister-isa, Bangladesh ken o dak sendakba nung opposition party temi ola madokba atema parnoka aitsüogo.

"Parnoki Iraq aser yimtung nung iba amala tatalokbatem indang jembir, saka iba ken o nung yabo ola madoker," ta pai ashi.

**MNF-i Manipur CM Biren mapa nungi anentsü akhang**

**Aizawl, November 29 (Agencies):** Mizoram nung opposition party tongtiba Mizo National Front (MNF)-i Manipur Chief Minister N Biren Singh mapa nungi anentsü takhangba ka agütsüogo.

Manipur nung tang Meitei aser Kuki-Zo kintem tsüngda azütokshi lendong ataloker aliba mazüoktetba atema MNF-i pa aija mapa nungi anentsü khanga liasü.

MNF media cell general secretary VL Krosehnezhova-i ashiba agi, Singh-i jenjang tapet magiba aser tashi mashiyimi amshiba ajanga tensa tamajungba kümshidaktsüogo aser pa lenisüba ya taktsüka aser tagidak mali kümogo.

Krohsehnezhova-isa, Singh-i aniba sorkari mangatetep adoker

aliba mebenetba dang masü saka tai maketba nüburtem timtem tekangshi nungi jenboa metoktsüteter, ta ashi.

"Onoki Chief Minister Biren Singh tangsa tang mapa nungi anentsü akhang. Centre sorkari iba mepetmesü tembangdaktsütsü atema takaratiba nung jenjang tapet agitsüla aser Manipur nung aliba nüburtem nem parnok temeden aser meraket meyipa agütsütsüla," ta pai ashi.

Iba mepetmesü ya 2023 küm May ita tenzük aser tang tashi nung nisung 250 dak tema taküm samaogo aser iba ajanga Zo nunger kanga akoksadaktsüogo, shirnok dang Mizo mesüra Zofate nunger ta ajar.

Krohsehnezhova-i ashiba agi,

iba azütokshi lendong nung Zo nunger 219 taküm samaogo aser nisung 41,425 pei talidak ki toktsür jenaogo, shirnok timbaka kidanger state tem nung jenoka lir.

Ki 7,000 aser tenlaki 360 aser Zo nunger yimtsüng 200 shi raksatsüogo mesüra rongtoktsüogo.

MNF lenir yagisa, pei taküm aser lokti kümzüka ayutsü atema Zo nungertem longjemshitsü ayongzüka liasü.

Maneni pai, Mizoram sorkar aser nüburtem dang, Manipur nung mepetmesü aodokba ajanga jenshia or alirtem nem maneni teyari agütsütsü aser Myanmar aser Bangladesh nungi refugee tem nema teyari agütsütsü mepeshia liasü.



MULUNGNEN O



Asür Chubazungla Aier Aug18,1980 - Nov.16 2024

Onoki teti meima aliba Ojala, Kibubai lezmüksüba arishi anogo tembanger iba alima nungi pila aoba mapang shirnokisa nübu, rongsen, shisatsü aser sarasadem agi yariogo nenok ajak dangi pelaba lemsateper. Tsüngremi nenok kija taküm aser kibongtem tali mojangma ta onok sarasadem.

~ Temeim, Kinungbu, Chirnurtem aser kinungertem.

MULUNGNEN O



Asür Akangnungla (Longkong) Aug. 1928 - Nov. 27, 2024

Onoki teti meima aliba arishir Ojala/Otsüla Tsüngremi küm 97 tashi lidaktsür külen iba akümüli nungi pila aoba mapang shirnokisa nübu, rongsen, mapang, shisatsü aser sarasadem agi yariogo, nenok ajak dang ozü shisa taroktiba nungi pelaba mulungnen o lemsateper. Asen Teyanglur Tsüngremi nenok ajak maneni mojang ta sarasademtsür.

Ojalai asoba onok jala jabaso 8 lir, yang nung jagi mezüng semchir 31, tanabuba semchir 35, aser tasembuba semchir 1 yutsür onok nungi pelasetta pilaogo. Ojala/otsüla ama onoka iba lima nung Tsüngremi sakloka arishi talang lidakjangni ta aji onok teimla aser sarasadem.

- Temeim Chirnurtem, Semchirtem & Kinungertem.

TEPELA LEMSATEPER



ASO: 01/05/1930

ASÜ: 16/11/2024

Nübur ajak den sakuku sadoka litetla ozü temeim ojala Mrs. Temjensongla Ozukum (Mongsenyimti Compound) joko alishi nung tain küma temang tashi meiti aliba mapang nungi la nem Tsüngremi agütsüba arishi 16 November, 2024 tembanger onok mulung animesüngzükteti alidang yimer yimsangertem aser pur bendang balala nungi temba tinurtem shinokisa ozü mulung anisüngzükjia sarasadem den pei akokba rongsen aser teyari balala agi onok den lemsatepogo, nenok ajak dangi tsüngdong arua majurutet nung iba osang kakat ajanga nenok ajak dang kinunger rangbeni kümrem pelaba lemsateper. Asen Teyanglur Takar Tsüngremi nenok kija kibong aser lokti ajak molamoshia mojangma ta sarasadema iba osang lemsateper.

~ Chirnur & Kinungertem.

Syria nung nisung 200 tema tepset

Damascus, November 29, 2024 (Agencies): Brihostibarnü Syria nung jihadist telungpurtemi Damascus nungi Aleppo highway amak aser idangji Russian air force-i civilians dena nisung 200 shi tepset.

Jihadist group Hayat Tahrir al-Sham (HTS) aser parnok den yaritepba teloktemi Aleppo province nung sorkari atsünga aliba tesemtem amak ta Syrian Observatory for Human Rights-i ashi.

Tang tashi nung iba rara nung HTS telungpur 102 dena nisung 182 süogo ta parnoki ashi.

"Russian air strikes-i Aleppo amakdang civilian 19 tepset. Külen Syrian army-ia civilian ka tepset" ta Observatory mendenbuba Rami Abdel Rahman-i ashi.

Russia-i Syrian President Bashar al-Assad den yariteper aser 2015 nung Syria civil war adokdang Russia-i mezüng shilem agia liasü.

"Iba rara ajanga nisung 14,000 jungnüa pei talidak toktsür jena ogo aser parnok tesadang ka tanurtem lir" ta UN Office for the Coordination of Humanitarian Affairs-i metetdaksü.

Bangladesh nung Hindu lennir indang bank account sota ayur

Dhaka, November 29, 2024 (Agencies): Bangladesh nung Iskcon nung taoba züngsem Chinmoy Krishna Das dena züngsem ajak indang bank accounts anogo 30 nü sota ayutsü tetuyuba agütsüogo.

Bangladesh Bank nung Financial Intelligence Unit (BFIU)-i bank aser senotsü reju balala nem Iskcon züngsemtem indang bank accounts sota ayutsü tetuyuba agütsü.

BFIU-isa bank aser senotsü reju ajak dang anogo asemnü tsüngda nisung 17 indang account-related information aser transaction statements ajunga agütsütsü metetdaksüogo.

Bangladesh Sammilita



Sanatani Jagran Jote atema spokesperson Das ya Hombarnü Hazrat Shahjalal International Airport nung apu.

Linük anema tasa atonga inyakba ken o nung pa dak tai tongloktsü aser Chattogram court-i bail temelaba magütsüi tepuokdak ayutsü oshidang

agütsü. Hindu nunger lennir Das pusemertem aser sepaitem tsüngda raratepdang lawyer ka tepsetogo.

Das ya Bangladesh nung International Society for Krishna Consciousness (Iskcon) taoba spokesperson lir.

Donald Trump lendong nung lir: Vladimir Putin

Astana, November 29, 2024 (Agencies): US President-elect Donald Trump ya aika ajangshia aruba aser shisa taka yimsüsür ka lir saka pa taküm agitsü merangba ajanga pa lendong nungi jembua mali ta Russia President Vladimir Putin-i ashi.

Taküm July ita Pennsylvania nung Donald Trump taküm agitsü merang. Ano September ita nisung kati Trump'er Florida golf courses ka nung rifle ka amshia Trump taküm agitsü tasa atong ta tai tonglokja liasü.

US election campaign agiba osang angashia kanga aoksa ta Kazakhstan nung summit ka

nung adenba sülen Putin-i ashi. "Khen dang masü anaben tashi Trump taküm agitsü merangba dena tim masüba maparen ajanga pa den toktepa liasü. Ni bilemba agibo pa tang lendong nungi jembua mali" ta Putin-isa ashi.

"United States putiotsü nung tatalokba aika liasü. Trump ya shisakar ka ta ni bilemer aser pai kümdanga alitsü aser angatettsü imlar" ta paisa ashi.

US election campaign nung Trump'er kibong aser tanurtem lutsüba angudang kanga aoksaogo. Iba inyakyim ya kanga majung aser Russia

nungbo ozüng alema inyakertemia yamaibo meinyaktsü ta Putin-isa ashi.

Joe Biden'er sorkari Ukraine nung rara tuluba kümdaktsütsü atema Western missiles amshidaktsüba atema osangbeneri asüngdangdang "iba ya Trump nem meyipa agidaktsütsü mesüra Russia den tesentaktep tamajungba kümdaktsütsü atema tasa ka asütsü akok" ta Russin President Putin-i langzü.

Kechi komar ka süang Trump-i lenmang ka bushitettsü aser Russia-i olemteptsü renema dang lir, ta paisa shisem.

Ceasefire mapang Israel-i Lebanon nung tesem ka amak

Jerusalem, November 29, 2024 (Agencies): Israeli fighter jet kati Lebanon nung tesem ka makokogo aser Israel Defense Forces (IDF)-i iba ya lendong ka noktangtsü atema inyak ta ashir.

Israel aser Hezbollah tsüngda Bodbarnepe nungi ceasefire tenzüka liasü saka Brihostibarnü Israeli fighter jet-i tesemji amak.

"Southern Lebanon nung Hezbollah-i mid-range rockets ayuba tesem ka nung kiralongraba maparen jangjatet. Southern Lebanon nung mapa lemezüka aliba IDF sepaitemi

ceasefire alema inyaksangshi masütsü atema inyaker" ta IDF-i metetdaksü.

Southern Lebanon nung ceasefire agreement alema temulung malemi bilemer nisung aika den garitem senzüba metet aser iba jagi 'warning shot' ka ama drone strike asü ta IDF-isa metetdaksü.

Markaba tesem nung gari ka anasa warning shot asü aser iba ya nisung yiruyibong masütsü atema inyak ta IDF-i ashi.

Ajisüaka Lebanese military osang ajangabo iba mapang nisung ana yiru.

Southern Lebanon nungsa

Israeli sepaitemi Taybeh yimtsüng amakdang nisung pezü yiru aser iba ya Israeli army-i ceasefire alema inyakba liasü ta Lebanon nung ketdangsur kati ashi.

Al-Bissariye, Shebaa, aser Khiam jilatem den Kfarchouba, Halta, Tayr Harfa, Mays al-Jabal, Kafr Kila, aser Aitaroun yimtsüngtem nunga Israel sepaitemi amak ta paisa ashi.

Hezbollah aser Israeli army tsüngda Bodbarnepe 4:00 (local time) nungi ceasefire tenzüka saka telok anaprongi kati ka dak ceasefire alema inyaksangshiba tai tongloktsüteper.



Indonesia kübok Semangat Gunung yimtsüng nung teyaritepertemi anentsüh nungi tasümgang ka agiteta bener aoba angur. North Sumatra province nung hopta ka tashi tsünglu kanga aruba ajanga zümetsüng aser anentsüh lendong aika atalokogo. Tang tashi nung lendong balala nung nisung 31 süogo aser ketdangsurtemi 'emergency disaster declaration' meshir. (Jakarta, November 29)



## Longkhum Cherry Blossom Festival tembangogo



Longkhum yimtak Yimpir Küjajen tesem nung kümnabuba Cherry Blossom Festival anogo asemnuba amongdang 1st Cherry Blossom Marathon Race aser 1st Mongponaro Mini Endurance Cycling tetoktepbatem nung takok angurtem tangokba noksa.

**Longkhum, November/Yimpoksüi 29 (TYO):** Longkhum yimtak Yimpir Küjajen tesem nung kümnabuba Cherry Blossom Festival anogo asemnü November 27 nü nungi tenzüka tanü tembangogo.

Anogo asemnü tashi Cherry Blossom Festival akadang teka agi renemtetba chiyungtsü, alu aser atsü nung züsentetba aonsotsü aser osettsüset balala yokpi yokraba liasü, iba den tetsü oshi tetoktepbata, Marathon Race tetoktepbata aser Cycling

tetoktepbata nunger agia iba Cherry Blossom benjongmong nung Mokochung aser temeket nungi nübur aikati semdang kanga dang longsoyepa takok nua tembangogo.

November 29 anogo 1st Cherry Blossom Marathon Race Mokochung Athletics den semtepa ayongzüka nung Female Category nung Mezüngbuba jenjang Süngtiyala C.Imchen-i ajangzüktet aser tanabuba jenjang Temjenmongla Jamir-i ajangzükteta liasü. Iba

den ano Male Category nung mezüngbuba jenjang Temjensanen-i ajangzüktet aser tanabuba jenjang Tekasanen-i ajangzükteta liasü.

Maneni ano Cherry Blossom Festival akaba nungtem nung The Ace Syndicate Mokochung den semtepa 1st Mongponaro Mini Endurance Cycling tetoktepbata agi aser iba nung mezüngbuba jenjang Liden Imsong-i ajangzüktet aser tanabuba jenjang Renjeti Pongen-i ajangzükteta liasü.

## FIFA-i Best FIFA Football Award atema nominee tem sangdongogo



**Yimpoksüi/November 29, 2024 (Agencies):** FIFA-i, Best FIFA Football Awards 2024 atema nominee tem sangdongogo. Iba tetushi agütsüba sentong nung tebur aser tetsür asyartem club aser national jenjang nung tajungtiba asyartem tushitsü.

Iba tetushi atema fan temi vote asütsü asoshi mapang lapoktsüogo. Taküm fan temi Best FIFA Men's 11 aser Best FIFA Women's 11 atema vote sütettsü.

Award tasen, FIFA Marta Award-a bendenlokogo. Iba tetushi ya tetsür football asaya nung goal tajungtiba idaktsüla nem agütsütsü.

Best FIFA Men's Player, The Best FIFA Women's Player, The Best FIFA Men's Coach, The Best FIFA Women's Coach, The Best FIFA Men's

Goalkeeper, aser The Best FIFA Women's Goalkeeper atema vote ya fan tem aser national team captain aser coach tem aser media tsüngda kasasa lemdanger lir.

FIFA Marta Award aser FIFA Puskas Award angurtem ya fan tem aser FIFA Legends panel kati vote agütsüba sülen shimer.

Taküm temelenshi tongtibang kaji, The Best FIFA Men's 11 aser The Best FIFA Women's 11 shimtsü atema fan tem densemdaktsüba ya lir. Fan temi nominate süa aliba asayar 77 nungi shimtsütsü. Fan temi agütsüba vote aser expert panel indang vote ya kasasa lemdanger alitsü.

The Best FIFA Women's Player Nominees: Aitana Bonmatí (Spain, Barcelona), Barbra Banda (Zambia,

Shanghai Shengli/Orlando Pride), Caroline Graham Hansen (Norway, Barcelona), Keira Walsh (England, Barcelona), Khadija Shaw (Jamaica, Manchester City), Lauren Hemp (England, Manchester City), Lindsey Horan (USA, Olympique Lyonnais), Lucy Bronze (England, Barcelona/Chelsea), Mallory Swanson (USA, Chicago Red Stars), Mariona Caldentey (Spain, Barcelona/Arsenal), Naomi Girma (USA, San Diego Wave), Ona Batlle (Spain, Barcelona), Salma Paralluelo (Spain, Barcelona), Sophia Smith (USA, Portland Thorns), Tabitha Chawinga (Malawi, Paris Saint-Germain/Olympique Lyonnais), and Trinity Rodman (USA, Washington Spirit).

The Best FIFA Men's Player nominees: Dani Carvajal (Spain, Real Madrid), Erling Haaland (Norway, Manchester City), Federico Valverde (Uruguay, Real Madrid), Florian Wirtz (Germany, Bayer Leverkusen), Jude Bellingham (England, Real Madrid), Kylian Mbappé (France, Paris Saint-Germain/Real Madrid), Lamine Yamal (Spain, Barcelona), Lionel Messi (Argentina, Inter Miami), Rodri (Spain, Manchester City), Toni Kroos (Germany, Real Madrid (now retired)), and Vinícius Jr (Brazil, Real Madrid).

## Syed Modi International: Sindhu, Sen na semifinals-i iogo

**Yimpoksüi/November 29, 2024 (Agencies):** Tang asaya aliba Syed Modi International Super 300 badminton tournament nung India nunger nungtugu asayar PV Sindhu aser Lakshya Sen nati tetsür aser tebur kija asaya nung Hokolbarnü pei tata asaya straight-game nung koka semifinal-i iogo.

Top seed Sindhu shibai iba asayamung anaben (2017, 2022) koka lir, lai quarterfinal nung China tsür Dai Wang 21-15, 21-17 agi minute 48 nung koka liasü.

Lakshya shiba 2021 World Championship bronze medalist lir paia tebur kija asaya quarterfinal nung asaya amokbanger asaya-a külem India nunger asayar Meiraba Luwang Maisnam 21-8, 21-19 agi koka liasü.

"Tanü asaya tongtibang liasü. La kü dang nungi rank tekübokba nung aliba asayar süaka aji tongtibang masü. Ni yashi aibelenbatem metongshiogo aser tanübo item aibelentem memenai liasü. Ni tetenzük nungi aggressive süa asaya. Yashi den medemdangra tanü tajungba asayaogo," ta Sindhu-i ashi.

Sindhu ya tang world rankings 18buba aser Wang 118buba nung lir.

Semifinal nung Sindhu külem India tsür Unnati Hooda den asayatsü aser Lakshya Japan nunger asayar Shogo Ogawa den asayatsü.

Hooda shibai 2022 küm Odisha Open koka liasü, lai quarterfinal nung 21-16, 21-9 agi USA tsür Ishika Jaiswal koka liasü.

Second-seeded tetsür tarep asayar Treasa Jolly aser Gayatri Gopichand natia sixth seeds Go Pei Kee aser Teoh Mei Xing na 21-8, 21-15 agi koka semifinals-i iogo. Tena China nung season-ending World Tour Finals atema-a qualify süogo.

Tarep temeyoktep asaya nung Dhruv Kapila aser Tanisha Crasto nati Malaysia nunger Loo Bing Kun aser Ho Lo Ee na 21-16, 21-13 agi koka liasü.

Ajisüaka tebur kija asaya nung Ayush Shetty bo 7-21, 14-21 agi Ogawa-i tsükdaktsüogo.

Tetsür kija asaya nung Tasnim Mir aser Shriyanshi Valishetty nata quarterfinal nung tsüko.

## KHRISTAN OSANG : Tapak 5 nungi...

### Khristan publishers atema MAI LittWorld 2024...

Item ama tamangertemi pei oshi nung kaket ken o nungdaker; item kakettek rongnung pastor tem atema theological kakettek, Arogo züngsemtem atema kakettek aser tamanger-mamanger ajaki angatettsüa tongtibang onüktem keta aliba kakettek nungdaker, ta pai metedaktsü. "Oshi balala nung meyipzüka kakettek teyari ajanga alima nung Arogoi Tsüngrem yimli indang osangtajungji alima tatembanglen tashi prokter," ta lai ashi.

1985 küm nungi tenzüka MAI-i kaket ken o zülur mongintem aika adokdaksüogo aser tang tashi nung linük 90 nungi nisung 10,000 nem training agütsüogo.

Tejangrartem adenshia kati ka dang nungi angazüktsü atema LittWorld-i maongka agütsür. Tang ayongzüka ama conference nung Khristan kakettek adokba, kaket zülurtem, yimobilem zülurtem aser alima tesem balala nungi publishers dak sendakba

onüktem nung o lemettsü maongka angur.

MAI LittWorld conference nung adenertem dang general marketplace nung yakyaka inyakba dang masü saka tanurtem atema kaket tajung adoktsü ajungshia liasü.

"Tanurtem dang ochi ashitsü atema tajungtibaji otsü lir. Tanur ka nem kaket agütsübaji tanurtem Yisu dangi anir aoba amai lir," ta MAI-Europe Board Chair, Janet Wilson-i ashi.

LittWorld Conference tatembangbuba aonung Mexico tsür aser kaket 20 zülur, Keila Ochoa nem MAI Distinguished Trainer Award agütsü aser Benin nungi Célimène Bada nem tang mezüng agütsüba Judith E. Markham Editorial Legacy Award agütsü. La ya "Pressec Bibliques Africaines (PBA)" nung inyaker aser lar Arogo kaketnang nung manager inyaker.

LittWorld Conference nung Europe, Asia, Africa, Australia aser America nungi o jembirtem nisung 40-i shilem agia liasü.

## BILEMDANGANG

"Tasü aiter tia tajungba."